

# **Perancangan Pindahmilik Harta Keluarga Ke Arah Pengukuhan Kekayaan Generasi di Malaysia**

**Dr. Jasni bin Sulong**  
Bahagian Pengajian Islam  
Pusat Pengajian Ilmu Kemanusiaan  
Universiti Sains Malaysia

## *Abstract*

*The management in the distribution of property nowadays is very much important especially to ensure it to be given to the right party peacefully. "The right party" is including our heirs or dependant. Thus it serves as a warranty for their future security, maintain the sustainability of life and enhance their socio-needs which contribute to the paradigm-shift of ummah. Therefore, every parent should aware about their family future plan especially for the benefit of their descendants by having a good management in the property distributions. In Islam, the law of inheritance is not the only way to hand on the assets but there is a few other solutions in order to distribute the property in a very well-plan such as gift of love, wills and selling it under market-value. All in all, by having many ways in distributing the property, the descendants are secured without having trouble in dividing the property among them and ensure certain heirs and assets are treated in a well-manner.*

## **1.0 Pendahuluan**

Perancangan pindahmilik harta dan pengukuhan harta generasi merupakan isu yang sangat penting pada hari ini. Ia bukanlah untuk menunjukkan Islam mengutamakan kebendaan tetapi lebih kepada jaminan kesinambungan hidup sosial pada sesuatu masa. Justeru dalam perbincangan ini, tumpuan akan diberikan kepada gesaan supaya masyarakat Islam melakukan perancangan dalam pindahmilik harta demi kebaikan anggota sesebuah keluarga. Skop ini tidak lari daripada maksud firman Allah SWT dalam ayat 6 Surah al-Tahrim yang berbunyi:

يَا أَيُّهَا الَّذِينَ آمَنُوا قُوا أَنْفُسَكُمْ وَأَهْلِيكُمْ نَارًا

Maksudnya: “Wahai orang-orang yang beriman, jagalah diri kamu dan ahli keluarga kamu daripada api neraka!”

Menjaga keluarga daripada api neraka adalah membawa pengertian yang luas hingga termasuk juga menjaga daripada segala perkara yang mendorong ke arah itu. Kitab Tafsir al-Jalalayn membincangkan aspek penjagaan ini daripada sudut ketaatan kepada Allah SWT iaitu supaya manusia tidak alpa yang boleh menyebabkan mereka derhaka kepada Allah dengan melakukan kemaksiatan, pencabulan moral dan sebagainya. Oleh itu, antara perkara yang perlu dielakkan dalam keluarga ialah kemiskinan dan pergaduhan sesama ahli keluarga hingga membawa kepada perpecahan keluarga, sifat derhaka pada ibu bapa dan sebagainya. Pada hari ini, tidak hairan bahawa pergaduhan dan pertelingkahan dalam keluarga sering berlaku sehingga menjejaskan ikatan silaturrahim apabila melibatkan isu harta. Justeru, masyarakat memerlukan dakwah kekeluargaan khususnya dalam aspek pengurusan pindahmilik harta bagi memastikan kebajikan ahli waris dapat dipastikan sepenuhnya di samping mewujudkan ketenteraman dalam keluarga. Kesan positif yang bakal dicapai dalam pengurusan keluarga ini menjadi agenda penting dakwah dalam masyarakat Islam supaya kehidupan umat Islam sentiasa dalam keadaan sejahtera, harmoni dan terus.

## **2.0 Dakwah dalam Pengurusan Harta**

Perluasan maksud dakwah menuntut apresiasinya dalam mekanisme yang lebih besar seperti dalam bidang pengurusan harta. Ini kerana harta menjadi aset kehidupan yang terpenting pada hari ini dan menjadi punca kekuatan dan kemunduran sesebuah masyarakat atau keluarga. Perlu diketahui, perbincangan mengenai harta tidak sepenting perbincangan mengenai pengurusan harta. Mungkin harta mudah diperolehi tetapi untuk

menguruskan harta yang dimiliki dengan penuh bijaksana. Konsep pengurusan harta seperti inilah yang akan menjadi titik tolak kepada aspek dakwah yang perlu diterapkan ke dalam amalan anggota masyarakat pada hari ini.

### **3.0 Pengurusan Harta dan Pengelakan Pusaka**

Harta yang berada dalam pemilikan seseorang iaitu ketika pemilik harta masih hidup dan sihat, maka harta tersebut adalah menjadi haknya yang eksklusif. Pemilik berkuasa untuk mengguna, membelanja dan menguruskan harta-harta milikan ini dengan bebas selagi tidak diharamkan syarak. Tiada siapa yang boleh mencuri, merampas atau merosakkan harta tersebut melainkan akan dikenakan tindakan undang-undang dan membayar pampasan yang tertentu. Dalam hal ini, seorang pemilik harta berhak untuk menjual, mencagar, memberi secara percuma atau mewasiat kepada orang lain harta yang dimiliki. Justeru pada asalnya, seorang pemilik tidak berdosa apabila membelanjakan keseluruhan harta semasa hidup dan meninggal dunia tanpa harta. Selama mana perbelanjaan tersebut diharuskan oleh syarak, tiada kesan yang tidak baik kepada para waris dan mempunyai niat yang baik (*mala fide*). Dalam sejarah Islam sendiri dicatatkan, para Sahabat besar dan hartawan telah meninggal dunia dengan harta yang sedikit. Misalnya Saidina Abu Bakar yang telah mewasiatkan sebahagian besar daripada kebunnya kepada baitulmal. Tindakan ini bukanlah satu pengelakan daripada membahagikan harta mengikut hukum pusaka tetapi menggunakan keharusan menguruskan harta mengikut jalan yang telah diharuskan syarak.